


日本漢文學百家集

王焱 編

370



YSP
北京燕山出版社

王焱 主編

日本漢文學百家集
370



北京燕山出版社

第三七〇册

得庵詩文	二卷	鳥尾小彌太著	明治二十四年	……	一
古素堂詩鈔	上下卷	漙全亮著	明治二十七年	……	一〇三
鐵櫺詩存	三卷	大江卓著	明治三十六年	……	一九一
揚鶴詩稿	一卷	大江卓著	明治三十九年	……	三二七
明星山房詩鈔	一卷	大江卓著	明治四十一年	……	四四三
鷹巢詩文抄	一卷	湯川慎三郎著	明治三十八年	……	五二九

得庵詩文

全

得菴詩文序

詩文者。言語而已矣。言語者。身意之發於口而已矣。是故身口意三業相應。而十善自全者。其詩文無不善。無不善則無不巧妙矣。觀諸聖賢佛陀之所作可徵也。周公詩若文。盡善盡美。郁々乎盛孔子之詩。唯存泰山梁木數句。而易象傳皆押韻。有似詩者。如其文則所謂天


之未喪斯文者。以斯文爲任。卽以斯道爲任矣。佛陀之瀾翻長舌。極其善巧。經則其文。偈則其詩也。雖以屈原莊周之大才。而不足以望其項背。洵千古之鉅觀也。夫何以至於此耶。豈非由于三業相應。而十善自全耶。後之作詩文者。或徒求工巧于字句之間。而不知反省之於身意。猶欲水流之清。而不察泉源之

濁。可謂惑矣。得菴鳥尾君。學窮儒佛之
奧。識達當世之務。曩著王法論。今刻此
編。讀者當知身意之善者。發於口亦無
不善也。君嘗印施慈雲尊者十善法語
于世。蓋非獨行善于其身。亦勸人爲善。
汲々不怠如此。其詩文欲不善可得乎。

明治十七年八月

敬宇中村正直撰

得 港 設 書



得菴詩文卷之一

烏尾得菴著

姪 三輪清吉輯

古今體

余詩放縱汗漫。絕無風人閑雅之趣。然發胸中無盡之意。適困窮憂愁之嘆者。豈不與古賢人同歸乎。夫心動乎中。萬境應於外。相感而作聲。是謂之志。吾志之所之。誰知其言之合道與否乎。若有同感者。讀之。句句或爲金玉。否則瓦礫。之不若矣。涓叟投釣竿。而西山有餓夫。所守者異。而所遇者不

同。則喜怒哀樂之情。亦必有相反者也。

失題

故國三千里。思人獨倚樓。山々日落遠。水々月浮流。

王師征台灣有感

人道精忠報聖君。紛紛時事不勝聞。西風八月秋正好。去向青山看白雲。

一穗殘燈滅又明。沈々遙夜送秋聲。擣衣砧上千家月。應照征人萬里情。

失題

花流知水暖。柳動見風輕。一夜春愁雨。金閨多少情。

薩賊伏誅記喜

千兵殉國幾人還。百戰功成骨作山。得々先生無箇事。風流何以報人間。

有馬山中

流急狂風起。山深驟雨來。清閑忘日月。籬下長青苔。

墨江賞花

春江遠望水無涯。千里紅雲繞酒家。莫使騷人看子細。枝々只怕著空花。

度函嶺

鳥道遙通幽谷間。前程更望幾重山。先生不用鷄鳴

術。落月蕭條度古關。

初夏

雨浥青苔上。風生綠竹陰。北牕眠自足。起坐聽幽禽。
庚辰四月。請閒養病。移居浪華。以十七日發東
京。賦一絕。留別諸友。

我是東西南北人。風流到處物光新。京城又去爲何
事。只剩買春錢一緡。

相州途上

西指函關聳半空。征鞍吟斷落花風。行々不問前途
險。五十三程詩趣中。

函嶺山中二首

路窮生一路。山盡又重山。詩客吟思苦。撚髭過古關。
人行青嶂上。家在白雲間。關外廻湖去。仰看不二山。

清見寺

躑躅花開四月山。微風吹面上禪關。佛臺荒廢無人
賽。十里青松繞海灣。

濱松途上遇雨

山河遠隔更思君。落魄還憐舊將軍。古驛蕭條寒食
雨。一鷗啼破暮天雲。

過桶挾間

此地由來鬪兩雄。老松帶雨泣春風。人間莫復論成敗。竟是茫茫一夢中。

謁伊勢神廟神風歌

神祖神明悲吾儕。天風吹遍蜻蜓洲。

神子神孫

守茲土。遺風自存八千秋。富嶽高聳爲坤軸。日月長懸照萬國。君民有分非偶然。大道分明順帝則。仁義道德果法塵。天下一家保天真。區々何論儒與佛。唯心清淨闔國人。吾上。大廟頌古道。手捧幣帛仰蒼昊。寶刀斷邪魔。明鏡照妙心。正是沒字經。神人相交深。君不見。五十鈴水湯々流不竭。神路山上白雲

鬱。

長谷寺

倚山高架古香臺。紅白牡丹傍燈栽。無用道人股七
々。花初開處我初來。

到浪華。卜居城南天王寺村

飄然來此卜居人。自是悠悠物外身。談道乾坤生
氣魄。賦詩山水入天真。瓠壺貯酒時留客。瓦釜煎茶長
養神。別有仙緣君識否。浪華城下不埋塵。

著無盡藏論

床上書千卷。榻畔酒半樽。一讀超十地。三杯知四恩。

茫茫三界裡。經營別乾坤。空中認鳥跡。水上留刀痕。
有無吞了去。吐出一家言。

送三好重臣之東京

重臣時
進中將

把酒送君往。高歌披吾肝。三杯君未醉。一曲吾淚潛。
拂淚更勸酒。且語濟時艱。得失談笑裡。成敗指呼間。
將軍民司命。武事豈等閒。令嚴動失德。法密却生奸。
惠愛長輕侮。威竭引謗訕。治兵猶治國。至誠醫傲頑。
臨別進此語。爲君賀登壇。京城遇親友。應報吾心堅。
撫劍悲白骨。投筆見青山。

訪山縣含雪於旅亭。席上賦此